



392901  
392926

St. Dr.





2527 III. 5. 17



Ex-Libris  
PODHORCE

AORT. GRY




392901

392926

Mag. St. Dr. III

1041







2

1771  
1772

1773



# SACRA NUPTIALIA.

Auspicatissimo Hymenæo

*ILLVSTRISSIMI DOMINI,*

D. I O A N N I S

*I N Z A M O S C I E*

Z A M O Y S K I,

Supremi Regni Pocillatoris. Terrarum Po-  
doliæ, Copiarumque Exercitus Germanici, S. R. M.

*G E N E R A L I S.*

Cameneceñ, Laticouieñ: Calussieñ: &c.

*C A P I T A N E I.*

*ET LECTISSIMÆ SPONSÆ*

M A R I Æ C A S I M I R Æ

F R A N C I S C Æ

*Illustrissimorum Parentum*

HENRICI De la Grange Marchionis D' Arquien,

&

FRANCISCÆ Comitissæ De Chastre,

*FILIÆ CHARISSIMÆ.*

Ab inclyta Vniuersitate Academica Zamosceñ: inter festos ac faustos  
Gratulantium applausus.

Per M. ANDREAM ABREK Philosophiæ Doctorem, Ordinarium  
Eloquentiæ Profess: Canonicum Zamoscen:

*I N S T A V R A T A.*

Anno Domini M. DC. LVIII. v. Nonas Martij.

*Perill' et admodu' Risto Dno D. Proposito Zepolice*





**M**ulieris bonæ beatus Vir : numerus  
enim annorum illius duplex. Muli-  
er fortis oblectat Virum suum, &  
annos vitæ illius in pace implebit.  
Pars bona Mulier bona: In parte  
timentium Deum dabitur Viro pro  
factis bonis: Diuitis autem & pau-  
peris cor bonum : in omni tempore  
vultus illorum hilares.



*ECCLESIASTICI XXVI.*



392920

III





incom-



incomptæ Laudationis apparatu, frequentius laborare: quorum primum, Felicitas hæc tanta! quâ ab inito Coniugij Vinculo, neminem non recreastis, Nos, etiam beastis: omni prorsus simulatæ assentionis crimine absoluit; alterum, Vosmetipsi, magnitudine Nominum Vestrorum, inconsueto quodam robore & lumine sustinetis: dum non tam hic exigitis lumina, quàm suggeritis, dicenda Factis pensando, verba Rebus. Parum etiam fuerit hic disertus, quisquis in immensa meritorum amplitudine, non potius istorum catalogos & exempla, quàm verba verborumque curet purpurissos, candidæ in Patronos propensionis, quia è vario colorum coactos fucò, an non hostes? Promptum, promptum eloquentiæ flumen est; quando ingens laudandorum copia tam in promptu, ut quidquid ornandû stylo veniat, ornatum illi secum vehat, nec eam scribentis calamo lucem debeat, quam vel illi dederit, vel Orbi. Iterum hæc Vestra sunt, Magna, SACRA sunt, ZAMOSCIA (verbo ut dicam) sunt ornamenta. Iterum concordia non minus quam vero suffragio, ad hæc Nuptiarum Vestrarum Festa assurgunt, & venerabundum Nominibus tantis inclinant caput, quibus in laudandis, ut nemo quamvis eloquens ac disertus exilitatem suam non queri, sic utcumque impolitus ac rudis, amplitudinem Orationi subitam non gratulari, non potuit: ille, quod nullâ dictorum vastitate, dicendorum multitudini sufficisset: hic, quod quamvis paucissima tetigisset, plurima videretur, quia maxima, dixisset. Quo etiam nomine, haud immerito ego forti meæ gratulari debeam, quod succrescentis eloquentiæ tyrocinia, non in villo prius, ad hanc publicam lucem trans miserim argumento, quàm in quo omnium mihi optatissimo ad Diuos hosce Connubij Vestri splendores, id demum felicioris lucri plurimum quoddam nanciscar solatium, quod non possim versari sine Laude, in tam magnifico laudandorum theatro, tam insigni laudum concursu. Quemadmodum ij qui suaevolentes rosas, vel odora balsama extremis etiam tangunt digitis, quod nusquam meruerunt, imò ne sperauerunt quidem, gratissimo quodam odore perfunduntur: & ab aromate, seu flore gracili contrectato, ipsimet suaevolent: sic gratissimi Vos terrarum exornatores Flosculi, nemo hucusque adiit Laudator, quin cui necessitatem dicendi meritorum Vestrorum gratiâ ingessistis; eidem conformem tantæ amplitudini non suggessissetis venustatem, ab illo fragrantissimo odore coloreque Illustrissimi Sanguinis, Sacratissimorum Maiorum, spectatissimæ Virtutis, augustissimæ fortunæ, gloriæ immortalis. Non, quasi hic illud mihi tribuam,



buam, quod tanta hæc Nomina, quæ fastu orbem superant, non simul meam aspernari & spernere exilem balbutiem non debeant: Neque quod ad tam solennem hanc celebritatem felicioris Coniugij, inter hæc non frequentes magis aut numerosas, quam insignes atq; eruditas gratulantium acclamationes, in quibus aggregandis exaggerandisq; omnis literarum ac literatorum census, quin & luxus est, censoriam quandã improuisæ audaciæ Crisim non extimescam; Sed quod existimem, idem incompto mihi quod perfectissimo cuius forte euenturum, vt Oratio quamuis vasta venustaq; sit, infra vestram procumbat dignitatem, nisi Vos intra eam esse iubeatis; nisi hæc quibus magnitudinem vestram auxisse voluerat lumina, vestra meritum specie illustretis: & vel initijs verecundæ, vel successibus hæsitanti, tutricem illam à Zoilorum conuicijs manum supponatis, quã quidquid in orbe tutum est, sustinetis. Accedit, quod ad hæc NVPTIALIA SACRA, auspiciatissimo Vestro Hymenæo, totis Academiæ Nostræ è Votis, totoq; conatu Sacra, eum Nobis omnibus Gratitude publica, eum obsequens erga Fundatores Pietas diem dixit: vt extra literas hic fuerit, qui hic non fuerit. Tantum est, tantis Solemnijs non adesse, quin sine munere adesse, (sine quo superstitiosa Antiquitas Deos adire vetuit,) sacrilegium. Atqui & id si vlllo officio nostrum, beneficio omni Vestrum munus est, honore Vestrum, pretio Vestrum: Vosmetipsi gratissimum hoc immortalitati Munus estis: & licentiam tantum proferendi eius in hæc SACRORVM lucem, nobis conceditis, ipsi exornatis, Venustate Generis, pulchritudine Meritorum, specie Honorum; quos si quando, nunc certe ad NVPTIALIA SACRA decuit prodire: vt ad publicos solennioris lætitiæ plausus, Maiorum splendori pares, compareretis. Agite vero SPONSI ILLVSTRISSIMI, quam ipsi cum Augusto Sanguine & Inclyta cum Virtute, ad primas Tædas attulistis Maiestatem, eam publicis, & Academiæ Vestræ Votis accipite cumulatiorem, Gentilitiæque probè instructam pompâ, humiliori stylo mihi adumbranti, vt consueuistis ad SACRA, tenemini ad VESTRA, facilibus animis estote.

Neq; verò diutius mihi ad tam varios SACRORVM apparatus anceps ille torquendus animus, quidûc primum miretur? quid stupeat? indagandus: vbi in limine, toti æternitati ac orbi spectanda, immensa Familiæ Maiestas se explicat, fida illa, si obsequia pensamus, Comes, si beneficia, SACRORVM Fautrix: Augusta meritis Atavis, Diues amplissimis Honoribus, Magna ingentibus promeritis,



promeritis, nominibus, laudibus, trophæis, & ut pari sibi constet  
Elogio, SACRA, ZAMOSCIA, TVA. SPONSE ILLV-  
STRISIME. Fuerit sane illa quàm non infrequens tam suspecta  
aliquorum contentio: qui cum Salustiano Mario feliciores arbitran-  
tur eos, qui non naturæ sed meritis, non sanguini sed virtuti si quam  
habent, debent dignitatem; & feliciori fato quopiam authores po-  
tius nobilitatis quàm hæredes esse, meruere. Steterit & illorum si  
quo stabili pede potest, nimium lubricæ progressibus Fortunæ, nimi-  
um in cautè fidens confidentia, quicunq; Principem illam Dearum  
ita prono affectu in genesim suam conspirauisse autumant; Ut vel  
genere infames, vel conditione seruos quaquauersus comitetur: &  
aliàs libera ne dixerim dissoluta, vilis cuiusdam atque obsequentis  
famulæ captiuos vultus induat, nulli eorum imperio non adsit, nul-  
li conatui non pareat, vestigia honoribus sternat. Mihi certè ut  
non absq; næuo plausus hi, quia non absq; delusorio factorum co-  
mitio, sic in ijs duntaxat minus ingenuis arrident ingenijs, quibus è  
plebe rusticâ oriundis, rectè gerendarum pro Patria rerum cum &  
necessitas desit & facultas, solus ille seruilis metus superest, ne si  
genere Nobiles, ignobile quiddam perpetrâint, hoc sibi publica fa-  
ma an infamia adscribat, quod Cæsaribus Tyrannis scripsit aliquis;  
*Illustriores fierent, si obscuriores nascerentur.* Insignium profectò  
Familiarum hic ritus est: quod cum secum publicam ferat ubiq; ma-  
iestatem, nec ad priuatæ alicuius sortis regulam, cœlo dignos ac-  
commodet spiritus, sed ex natiui Sanguinis authoramento vitæ suæ  
legem ponat, tum nihil fortunæ cuiuspiâ debeat obloquijs, quisquis,  
ut esset illustris nascendo meruit; secumq; bene viuendi necessita-  
tem in mundum tulit: æquè de sanguinis certus claritate, ac de vir-  
tutis persuasus incremento; quam in sanguine hereditauit, cum lacte  
bibit. Vsq; adeo *Fortes creantur fortib; & bonis.* Vsq; adeo insigni-  
um Familiarū hæredibus, hæreditatis in virtutem Ius præstò est, ab  
hâc in merita, & quibus ea pensantur, præmia per orbem Resq; Pu-  
blicas augustissima. Nec iniuriâ. Siquidè quamuis nemo in alienam  
vixit virtutem; nullaque Maiorum dignitas degeneres successorum  
animos, non fœdauit potius quam honestauit: tamen ista est nobili  
quædam ingens Sanguini ingenuitas, quod tantò quisq; cæteris ex-  
cellat, quantò illustrior à natura venit, & quam alii per tot laborum  
dispendia, tot temporum intervalla quæsière, domi natam reperit,  
& augendi Nominis claritatem, & agenda necessitatem virtutis.  
Quod dum dicitur, Tibi primum SACRVM esto, SPONSE IL-  
LVSTRIS-



LVSTRISIME quem augusta Antesignani in orbe Polono Gen-  
neris magnitudo, quâ gloriæ luce, quâ Originis vetustate ita exor-  
navit, ut dubium sit, an aliquid, hæc, seu vetustate antiquius, seu  
luce splendidius viderit Polonia. Quidquid enim ei ab illustribus  
Magnorum Heroum Prosapijs, quidquid ab eminentibus Togâ Sa-  
goq; insignium Virorum meritis, hinc ut ab ortu suo regnandi auspi-  
cium & robur sumpsit, splendoris atq; dignitatis fuit; illud totum  
adeo fœderatis voluntatibus in Maiestati Tuæ Illustrissimæ Domus,  
conspiravit, inque hanc eius lucem sic coaluit, ut nihil equidem  
in tam amplo Regno sit amplum, quod lumen huic, vel ab eadem  
sibi non mutuârit: quod in consortium eius Sanguinis non venerit;  
cui, nisi benignius cælum exteri Magnitudini prærogatiuâ nubendi  
providisset, Consors non erat. Quidquid etiam Respublica  
nostra, fulminei in bellis quo terrebat hostes habuit fulgoris: quid-  
quid tranquillis temporibus, splendidissimæ possedit dignitatis; id  
aut Domui Tuæ concedidit, aut ab hac assumpsit; in qua tot de fu-  
sis Hostibus Victrices, tot de Ciuibz servatis Ciueas, tot de Vrbi-  
bus Arcibusque, hostium ereptis, Patriæ recuperatis, Murales Co-  
ronas, tot barbaris detracta spolia, tot emeritis bellis Laureas, tot  
triumphos, tot Arcus, tot Nomina, tot Subsellia, tot Honores, tot  
elogia, tot exterorum miracula, tot vota, si fuga inanis fastûs, ut  
mos est aliquibus, pomposis non explicat præ atriis, certe iusta pe-  
rennitatis memoria, gratâ in omnium recordatione consignavit.  
Quidquid insuper amplissimum hoc ipsum honorum Domicilium  
(Polonia inquam) habuit Honorum; id tam liberali ac libero finu  
in Tuam Paterni Maternique Generis affinitatem cõdegit, ut nihil  
prope habeat, quod vel in bellis strenuè, vel in pace gloriosè, vel pro  
Rostris disertè, vel in consilijs eruditè, vel pro cancellis tersè, vel in  
Curia Sanctè, vel domi liberè, vel foris grauitè, non per fortissimos  
Exercituum Duces, prudentissimos Regni Cancellarios, zelosissi-  
mos Sacrorum Antistites, fidelissimos Consiliarios, amplissimos Se-  
natores, eloquentissimos Legatos, æquisimos Iuris arbitros, aman-  
tissimos boni publici Ciues, auidissimos famæ ac immortalitatis  
Heroas, *Zamoscios, Herburtos, Tarnouios, Ostrogios, Zastauios,*  
*Odrougzijs, Kostkas, Lubomirscios, Chodkieuicijs, Korybutos Ko-*  
*niccpolscios* actum habeat. Tanta hæc, totq; Nomina, an non & Nu-  
mina? totq; iis alia cognata, amplissimæ Tuæ Affinitati iunxisti: tot  
inuicem, tam insignibus, (nam Principibz in Orbe Polono) Familijs,  
es coniunctus. Dixerim iam, Gentilitias Tuas Sarissas, ex ipsis Po-



lonæ magnitudinis Insignibus enatas, nempe, illis Infulis, Mytris, Aposphragismatibus, Clavis, Caduceis; in ipsiq; Sellis Curulibus sedem fixisse: nisi amplius quiddam illi, qui profusissimis Panægyribus deduxerunt, ei cuidam feliciori fato & commodo Reipublicæ editas, ut essent periclitantis sustentacula, ruentis fulcra, florentis insignia, & propulsatrices illæ ac expultrices hostium Columnæ, ad quas Herculeo Vestro robore & Nomine insignes, nemo illorum quamlibet vastus & vastator venit, qui non tam Imperium quam Oraculum illud exhorruerit, *nè plus ultra* insaniret. Commodum hinc recenserem, à primo Nominis & Generis Vestri Authore *Sario Kozlorogio*, à primà Rerum Polonarum origine, hanc usq; ad eius lucem & molem, quæ pro Aris Sanctos, quæ pro Focis strenuos Præsules, Ciuesq;. Hinc cum *Zdislao Archiepiscopo Gnesnensi, Thomas Wratislavienses, Florianos Cracouienses, Georgios Chelmenses, Ioannes Luceorienses* Antistites, zelo Diuini & Patriæ honoris, amplissimis quibusq; pares. Inde, cum *Floriano* in Campis Pruthenicis, non tantum manus viriliter cum Crucigeris conferente, verumetiam viscera pro incolumitate Patriæ liberaliter effundente, post innumeras in diuersis Regni Districtibus, variorum Officialium cohortes; *Felices Succamenarios Belzenses, Ioannes Marefchalcos, Nicolaos Referendarios Regni, Ioannes Chelmenses, Venceslaos Leopolienses, Stanislaos iterum Chelmenses Castellanos*, Viros in Senatu graues, in bello strenuos, domi & extra, ab omni Bonorum Ciuium virtute commendatos: Sed in illis recensendis atq; ad omnem gloriam omni cum elogio ut merebantur transmittendis, ita multorum olim ingeniosa sudauit contentio, ut frustra videamur ijs prela fatigare, quibus nusquam ita imprefferimus eorum dignitatem, quam illi præclare factis, toti æternitati, & cum hac laudi expresserunt. Sit vnus pro omnibus, omnium non solum Affinium iubar, sed & Ciuium illud vnicum exemplar; ingens ille Reipublicæ Polonæ, toti que eius gloriæ ac moli sustinendæ solus par Atlas, quia Nomine, Meritis, publicisq; Regnorum Oraculis **MAGNVS, IOANNES ZAMOSCIVS, AVVS TV. VS.** Boni Superi! quantum Nomen, quàm Regno auspex, quàm Regibus gratum, quàm hostibus formidandum, **IOANNES ZAMOSCIVS!** Ille, ille nimirum, qui ita primam ætatem Palladi consecrauit, sicque humanioribus primùm disciplinis pertinacem illum animum vouit, ut omne deinde in sæculum, vix ante audito commercio, literatum Martem induxisse Polonis meruerit; nempe cum,



eum, quo victis tot industrio bello hostibus, omnium spes & vota Ci-  
 uium, famam Imperatorum, memoriam ætatum vicit: nihil ag-  
 gressus cuius momenta non prius consilio iudicioque acerrimo per-  
 currisset; cuius agendi perficiendique facultatem, non animo vicisset:  
 tanquam quidquid aggrediretur, non casu vel impetu, non temere  
 aut fortuito, sed Consilio, consulto victurus. Ille ZAMOSCIVS,  
 qui cum se totum Reipublicæ dedisset, ita vicissim Rempublicam  
 in laborum honorumque suorum partem assumpsit, ut nihil vel illa bel-  
 lorum aut hostium haberet, quod non per Hunc vicisset: vel ille cape-  
 ret dignitatis, quod non ei detulisset. Ille, qui ad speculam Regni &  
 Orbis, Senator ac Imperator vigil collocatus ita una illa Dexterâ, lu-  
 ra & Arma Patria dextrè tenuit, ut nihil prope Iuris in Regno sit, si  
 non ei cum instituto a sancto Iustitiæ Tribunali, initia successusque  
 deferat: nihil armorum, si non pro hoc Duce militet, cui plures  
 victi hostes, quam multis visis militant, tota illustrium per Orbem  
 Imperatorum fama, tota vicinorum exterorumque elogia militant,  
 nusquam victo, toties Victori. Ille, qui seu attritis æmulæ poten-  
 tiæ viribus, seu fractis compressisque discordium cerebellorum co-  
 natibus, tam Regibus Sceptra, quam hos dare Sceptris, fide, fortitu-  
 dine, bello, victoriâ potuit. Ille, qui in tanta rerum potestate, tan-  
 tâque hac virium magnitudine, nullibi non mansuetos gessit illos  
 animos, quam Magni apud Magnos Reges Ducis, tam subditi fidelis,  
 ad quos, cum bellorum ipse sibi labores & pericula sumpsisset, fru-  
 ctum, decus, auspicia, gloriam referebat. Ille, qui cum non tan-  
 tum se superstiti Poloniam florere voluisset, verumetiam omne ad  
 ævum duraturam præsensisset, id ei duplex conseruandi liberi Sta-  
 tus felicissimum reliquit monumentum: nempe hoc situ aptissi-  
 mum, specie venustissimum, robore inaccessum, è quo bona, sa-  
 lutemque Civium, ab omni hostium insultu constantissimè tueatur,  
*Propugnaculum*: hocque inclytum *Musarum Domicilium*, è quo  
 frugis publicæ Viros, continua succedentium annorum serie nanci-  
 scatur. Magna hæc & præclara sunt, meritoque dum ad hanc NV-  
 PTIALIVM SACRORVM lucem, Honori Tuo dicuntur, quam  
 multorum opinionem excedunt, tam admirationem, ac fidem man-  
 cipant, cui tot à publica Civium confessione argumenta; quot in  
 Imperio præclare gesta, quot in Historiarum annalibus, passim cum  
 verà laude proclamata, quot ab exteris non sine invidiâ suspecta,  
 quot domi omnium honore amoreque habita: Quippe *Vir erat*,  
 (verba sunt, digni tanto Hectore Homeri, imò potius renati Polo-



niæ Cromeri, Pauli Piaſecij, Epifcopi Præmiſſienſis) *Armis & Li-  
teris Clarus, omniumq; Virtutum numeris abſolutus, Vindex ſeu-  
rus Iuris Morisq; Patrij; & cui ſoli totum debet Gens Polona, quid-  
quid Regalis dignitatis apud eam habet Stirps nunc Regia, quid-  
quid ipſamet priſci decoris, quidquid Libertatum retinet auitarum.  
Nec in Poloniâ tantum, verum in totâ Europa, inter multa ſæcula  
pauci eius pares nominari poſſunt.* Fama eſt, Rhodijs Syracuſa-  
niſq; tam propitium Solem eſſe, vt nullam prorſus diem viuant,  
quâ non eis ſerenus illuceſcat, quâ ſalutares illos radios non expli-  
cet, votiui mundo luminis, teſtes ac patres. Meritò hunc ego Po-  
loniæ Solem Illuſtriſſimum A V V M Tuum appellauero, quo ei  
in Zodiaco Senatûs radiante, nulla tam obſcura dies abiit, quâ non  
ſingularis continui ſplendoris radius affuſiſſet, nullum tempus, ſeu  
bellis horridum, ſeu odijs triſte, quod non hic Sol luſtraſſet, illu-  
ſtraſſet, conſilij promptitudine, virtutum ſpecie, pacis nitore; Di-  
gnus, qui PATRIÆ PATER diceretur, cui tantam peperit  
Maieſtatem; Dignus qui VTRAQVE CIVIS, quem nullum  
tempus diſcrimenûe, aut Conſulem æquum, aut Militem ſtrenuum,  
non requiſiuit ac agnouit; Dignus, qui & tantorum Nominum,  
vel ex aſſe Hæres, vel ex iuſto poſſeſſor, (quod Soli adſcripſit quiſpi-  
am) SOLVS, & VNICVS diceretur; niſi in tam mutuam,  
eius muneris ſocietatem, Succeſſores Vos ſuos vocauifſet, atq; etiam  
aſſumpſiſſet, vt credi non poſſet IO A N N E S deceſſiſſe, cui  
THOMAS ZAMOSCIVS ſucceſſit. Dulciſſimus inquam  
Genitor Tuus SPONſE ILLVSTRISſIME, Qui tam citò  
illum PATRIÆ PATREM, deſiderio primùm publico, tùm Re-  
gno huic reddidit, vt Ille deſiderari non poſſet, quando Hic expecta-  
ri non debuit, Paternæ non ſolùm fortunæ ac gloriæ, ſed Virtutis  
etiam Hæres, feſtinatæ indolis impetu, ſpem, annos, vires, præ-  
greſſus. Ita primus Iuuenilium eiûs annorum, præcurſor æui ſlos  
enituit: qui non alios poſtea fructus daturus erat, quàm fidelis in  
Reges obſequij, integerrimi in Patriam amoris, inuictæ contra ho-  
ſtes fortitudinis, ſummæ inter Ciues prudentiæ, & in omnibus Pa-  
ternæ gloriæ. Minus porrò de hoc tanto Viro dici fuerit, quidquid  
primo ætatis in curſu, pro literis doctriniſq; nobilibus, maximum  
ille egit. Quâ nempe cum laude ad Scholarum limina verſatus eſt!  
Academiæq; non in fundo aut patrimonio tantum, ſed in patro-  
cinio cultuq; etiam ſuo extructæ, quàm vberem ſæpè, magna de pro-  
fectu ſuo ominandi occaſionem ac copiam dedit? qua ergà Diuos  
pieta-



pietate, in Præceptores obseruantia, in Virtutem & Literas, animi promptitudine, qua ingenij maturitate immaturus annis creuit & qua dexteritate Municipalis primùm ad Comitia Legati, tum ad Tribunal Regni Iudicis Deputati, munus onusque obiuit? quo Exteros apud Principes peregrè proficiscens in amore ac honore vixit, quemadmodum extra laudatus est? quomodo nihil prope Iuuenis egit, quod non sedatam annorum maturitatem spiraret, postquam animi & consilij superasset? Etenim illud omnè prope excedit magnitudinem, quod vt ab exteris redux Patrios reuilit Lares, illum simul tuendorum atq; ornandorum eorundem animum assumpsit; vt nulum bellum, quin ne terrorem vilius belli audiret, cuius non primam grandemque partem suo repente consilio, sumptu, robore, periculo, sustinendam atque propulsandam suscepit: Sicque in oculis Serenissimorum SIGISMVNDI III. ac VLADISLAI IV. felicissimorum Poloniae Regum, varijs contra varios Hostes in praelijs versatus sit, vt vnanimi vtriusque Tanti Principis suffragio, & amantis Patriæ Ciuis, & gnari Bellorum Militis, & inuictæ Potentiæ Ducis, elogia meruerit, retulerit. Par eiusdem pro Toga contentio, & ob hanc, immunis ab omni liuore ac perniciæ laus; vt frustra cuiquam mirum videatur; tanto eum, tamque præpeti cursu, ad famam, honorem, dignitatem in Regno maximam ascendisse, illicque mansuetioris Iuuentæ meritis mox euectum, quod tardè senectus aliorum eluctari solet, consedisse; qui primus exemplo suo probauit, *Congeriem meritorum, exactionem esse præmiorum*; nec tam annorum mole ac mora, quam præcocibus Virtutum incrementis, Magistratuum Candidatos æstimari oportere, ijsque primùm tribui Honores, qui se primùm Virtuti manciparunt. Quippè Podoliæ primùm, mox Terrarum Kiouia Palatinus renunciatus, ita in utroque eo honore se gessit, vt & numerosissimis Ciuum Conuentibus frequens ille, præstò eum Consilij expeditum, in Iudicijs iustum, in publicis Confessibus grauem, ubique boni publici studiosum, viderit Senatorem; & hic ad infesta Thraciæ diademata situs, truciisque fremitibus bellorum Istri conterminus, è Martiâ Familiâ oriundum, bona, salutemque Conciuium, à vi & impetu hostium, promptissimis auxilijs toties defendentem, senserit Bellatorem. Ita Marte & Arte potens utrique Reipublicæ tempori, & omni vbiuis necessitati aderat, proderat, Palatinus ZAMOSCLVS. Quid verò hic referam eius quæ Vice Cancellarij dignitate illustrior pro Patriâ fecit, perfecitque promerita? non vicariâ vsquam industriâ, sed

C

principe



principe semper Virtute, authoritate, fide, sapientiâ Magistratum  
eum gerens regensq; , & victâ verbi iniuriâ inuictis laboribus, ad sum-  
mâ laudis atq; æstimationis fastigium, Tituli modestiam secum eue-  
hens, â quo nec totum Nominis tanti decus, potuit abesse diutius,  
qui plena semper decora pleno nomine, & meruit, & gessit? Quid  
dicam de prolixissimis erga eum Regiæ benignitatis fauoribus; â quò  
nihil prorsus honorum abesse voluerat, inclytus ille Principum Vi-  
rorum amor SIGISMUNDVS, cum primam ei in Regno digni-  
tatem, Castellatum videlicet Cracouiensem promississet, dicam  
amplius obtulisset, consignatisq; ac subscriptis in Chyrogaphis, tra-  
didisset; nisi ille vel honores ambire minimùm, maximùm mereri  
censuisset, vel in eo officio consistere maluisset, in quo suâ erga Re-  
gem & Regnum fidam semper operam, non in honoribus tantùm,  
sed in laboribus, ac molestijs etiam propagaret? Quid recenseam vel  
ipsum Cancellarij tantum tamq; illustre officium? Quid eo in ipso  
Herculeos recitem labores? Quid in euulgandis responsis plusquàm  
Tullianam facundiam, in absoluendis Iudicijs plusquàm Aristidæ-  
am æquitatem, in distribuendis præmijs, plusquàm Vlyssæam pru-  
dentiam, in indicendis supplicijs, plusquàm Catonianam firmita-  
tem? Qui præsertim sciam, ita hæc omnia, & his omnibus multò  
plura alia, in omnium animis atque etiam oculis hære, vt nemo  
quidē sit, qui singulare illud Optimorum Cancellariorū encomion  
illi non adscribat, cui omnia elogia omnis posteritas debet, ac defert:  
quòd fuerit prouidentix & beneficentiæ Diuinæ Os augustissimum,  
Iustitiæ lanx, & amussis integerrima, Dextera præmiorum di-  
spensatrix fidelissima, vindex scelerum & sceleratorum æquissima,  
Cor, delictum Regum, Reipublicæ firmamentum. Potuerit ergò  
de se aliquando terror ille Orbis Alexander M. dixisse, suos, si bre-  
ues adfuere annos, merita pensatura: illaque superbâ magis quam  
vera voce vt libet iactauerit: *Vixi satis, quia non annos sed triumphos  
numenui; metior me, non ætate, sed perennitate.* Profecto  
multò satiùs immaturos THOMÆ ZAMOSCII obitus eodē  
nos decorabimus Elogio; qui quamcunq; vixit ætatem, (vixit ta-  
men, si cum meritis comparetur, paucissimam) ita omnem bono  
publico, ita famæ vixit; vt cum tot pro Patriâ præclarè egerit, tot in  
bellis strenuè, tot in Comitijs liberè, tot in Iudicijs iustè sese gesse-  
rit: toties contra Hæreses pro Ecclesiâ, toties in perduelles pro Re-  
publicâ ultor excanduerit, tot illi Aras munifico sumptu, tot isti cu-  
ras laboresq; Heroico cultu consecrârit; tot in Augustissima Sobole,  
Catho-



le, Catholico ac Polono Orbi præsidia reliquerit: verbo, totum egerit, quod non perennes tantum, sed æternos etiam annos spirabat; ut inquam, iurè ab omnibus quemadmodum vixisse optabatur, sic mortuus immortalis dici, mereatur. At me quis hunc tandem concitatus rapuit impetus? quò præceptis abiisti calame? Ad hilares felicissimi Coniugij Tædas, luctuosas tristis sepulchri Nævias meministi? Cui bono? Quid lachrymis cum gaudio? quid communi lætitiæ cum publico planctu? quid NVP TIALIBVS SACRIS, cum lethali Sarcophago, quem pro Obitu incomparabilis Senatoris meministi? Nempè ut cognoscat Orbis SPONSE ILLVSTRISSIMÆ; quantum cum illo Viro amisisset, nisi Te feliciori fato quopiam NATVM EIVS PARENTIS, augendis Reipublicæ Honoribus natum, suscepisset: qui usq; adeò Paternæ in rebus agendis dexteritati, in Rempublicam amor, in Reges fidei, summaque in omnibus cum summâ Virtute felicitati successisti, sicq; omnia Paternæ, Avitæq; dignitatis decora possedisti; ut iurè, omnium è sensu ac assensu, vtrumq; illud Poloniæ Numen, Nomine ac Virtute in Tua ferre videâre, vtriusq; Gloriæ integer possessor esse; de quo vel vnico si omnem Maiorum amplitudinem quis existimet, haud difficile plurimam immensæ eius coniectationem habeat, & in quo solo, Vniuersa ZAMOSCIÆ GENTIS Nomina, Respublica habet, Orbis miratur. Neque item profusa illa immaturo fato extincti Illustrissimi PARENTIS TVI desideria, quàm crebra & ingentia fuere, tam vel aliena sunt, vel profana, ut Tuæ huic NVPTIALIVM SACRORVM pompæ, hisque gestientium votorum plausibus sacra esse non debeant, quibus, quidquid in Genere Vestro amplum, quidquid apud Maiores sanctum, quidquid ab Honoribus augustum, in victimam laudis cedit ac cedit. Decet enim hinc, sicubi aliàs, nuncq; si quando ampliùs eorum memoriam fieri, qui omnium temporum recordationem meruerunt, famam vicerunt: ut tam Insignia SACRA ij demùm Exornatores circumstant, quibus vnita ingenti Fortunæ summa Virtus, immensæ Dignitati Gloria immortalis quouis in puncto adstitit; quod in Sanctissimis Maioribus Tuis, promptiùs inueniri video, quàm ab alijs solet requiri. Atquè quod primùm ego innui, idem iterùm hinc pronuncio; nullo feliciùs in exemplari ingentem illam Maiorum Tuorum Virtutem posse videri, ac in Te ipso, quem mansuetior quædam cœli fortuna Hunc Illis prouidit Successorem, in quo non Vultus tantum Patrios, sed animos quoque omni Virtuti ac Hono-



ri pares sic expressit; ut viuum prototypon habeat Posteritas, in quo Par illud Heroum nobile, IOANNEM & THOMAM ZAMOSCIOS, omni voluptate relegat, omni officio veneretur. Scilicet ij. Te excepere Natales, quos cum Zamoscanis Sarissis, Illustrissima Ducum in Ostrog Sydera, ita de Tuo lucidissimo semper Virtutis atque dignitatis splendore Orbi ac Famæ commendarunt; ut dubium non esset, totam in ætatem meritis, præmijsque in Regno maximis Illustrum Te victurum, cuius Infantis Cunas tanta Paterni Maternique Sanguinis auspicia decorarunt. Hinc quàm Tibi promptus ad studia virtutemque à teneris animus, tam bonis omnibus cita spes, & ab hac fidele augurium fuit; Magnis Te aliquibus Reipublicæ commodis natum, magno Regum solatio ac amoris, qui nondum Adolescens, maturos solertioris æui fructus in primulo annorum vere proferebas. Quis enim Te non iam tunc dixisset zelozissimum Diuini Honoris Religionisque Orthodoxę defensorem? quando primis in Ephebijs, contra Schismata atque Hæreses seridò olim certaturum, iam tunc videret curiosè inuestigantem, quam in Religionem quisque propenderet & illosque acerrimè detestantem, quos aduersa Vni Sacræ Religioni Romanę, irreligiosa proin' religio haberet? Quis tunc non agnouisset fidum Te Regibus Tuis Subditum, & verè ex ijs vnum Ciuem futurum, quorum in sinu ad securi prolubium somni, vel nomine suo augustior Augustus quieturum se prædicabat; cum vidisset ad Inaugurationem & Coronationem VLADISLAI IV. Regiæ eius Chlamydis, laciniam ad Diuorum Aras processuri puerilibus vlnis ferentem, & quasi iam tunc probantem, nulli Te Regio olim obsequio non aptum, talemque semper Ciuem Victurum, quales se exhibuere in prosperis & aduersis, cum longà antecedentium Maiorum serie AVVS & PATER ampliss: Nimmium verò habear prolixus, si indicia Virtutis augustissimæ, quam in exemplo intuemur, prolixius inuestigem; prodromosque dignitatis Tuæ istius flosculos aureo ex annorum vere colligam, quam experimur in fructu. Ne tamen iniuria sit præsagijs, quæ nemo Laudator non adhibuit, in Te plura sunt, quàm dici possint; vnicum mihi instar omnium sit, iurèque idem maximum, quod ita nimirum ab Ephebis, humanioribus Literis Te dedisti, ut neminem non Augurem haberes Magnæ Tuæ Virtutis, insignium in Regno Honorum, infractæ erga Reges constantiæ, perfectæ Viri, Ciuisque boni, cum omni Amplissimorum Maiorum laude, dignitatis. Etenim posteaquam ad exaggerandam illam quam à Natalibus accepisti Gen-  
neris &



neris & Nominis Tui amplissimam dignitatem, duo hæc sola cum Bonis Cordatisq; omnibus media putauisses, primùm, quò Iuuentus tenera in Scholarum umbris ad publicam Regnorum lucem per humanissimas disciplinas solet erudiri; alterum, quo adultior eadem, ex umbratilibus Gymnasiorum spatijs egressa, ad speculam Orbis in Martia Orchestra debet conformari; ita, ita profectò doctissimorum Præceptorum operâ, primam ætatem literis triuisti, vt & **ILLVSTRISSIMIS PARENTIBVS** multa hinc solatia, & planè omnibus insignem spem magni Bellatoris præbuissem. Testes eius quod dico sunt primitiæ Tyronum Artes, quarum serios decursus, ita præpeti cursu absoluisti; vt mirum esset, tantâ Te ingenij laude nedum Iuuenem, extitisse. Testes ampliores loco numeroque scientiæ, quarum nemini Ciue Polono dignæ non vacasti. Testes Principes Poloniae Magnates, testes eruditissimi Professores, quorum in oculis toties monstrasti, quantum in tractatis scientijs profecisses; nunc Orator pro Rostris disertissimè perorans, nunc Philosophus Ethicas, Politicas, cæterasque his vicinas Theses, acerrimè defendens ac oppugnans, magno attendentium, stupore, solatio, omine. Quibus ita feliciter instituto, non diu Tibi videbatur cogitandum, quid in alta illa Poloniæ quiete, ampliùs pro eius commodo ac honore ageres, quàm vt illam amplissimorum Maiorum dignitatem, Tuamque ab humanissimis disciplinis quæsitam prudentiam videndam extrâ Tecum ferres; ipseque eò pergeres, vbi ex accessione insignium Rerumpublicarum, familiaritate prudentissimorum Ducum, Principum, Senatorum, alloquio virorum Doctorum, vel ipsa virtutis eorum cogitatione, animum Tuum ad omnem virtutem & gloriam natum, vsui Patriæ tantò aptiùs conformares. Perrexisti ergò ad Exteros, vbiq; Domesticam ferens Virtutem; alienaque in Regna non tam spectator, quàm spectaculum abiisti. Nemo Te ibi viderat, qui **ZAMOSCIVM** esse non agnosceret, amplitudine Generis, luce Factorum, specie Honorum, nemini terræ, nullisq; prorsus Populis, aut Gentibus, antequam venisses ignotum. Ita Te vbiuis gessisti, vt memoriam **AVI**, vt desiderium **PATRIS** in Exterorum animis excitares, ac etiam expleres. Quibusuis admirationem, Venerationemq; Tuæ Indolis imperasti; omnium Tibi amores & gratias mancipasti, præcipuè Virorum Principum, quos si recitem vniuersos, vltra quàm in immensum Orationem producam. Tango tamen aliquos, & partem potius multorum, quàm omnium seriem propono. Amplissimus *Venetia-*



*rum Princeps*, Aduenæ Tibi, gratissimè salutato, humanissimè recepto, cum in maximo Principum ac Senatorum Concilio locum, ac ordinem cesserit, quem nemini in tanto Gentis Spiritu, in tantis Reipublicæ ordinatissimæ auspicijs concessit. Mantuanum aduenti Ducatum, Excellentissima *Mantua Ducissa*, cum Illustrissimo Filio obuiam prodijt, omne officij ac humanitatis genus exhibuit. Magnus *Florentiæ Dux* Oras suas inuisentem, cum Cardinali Patruo, amantissimè salutauit; honorificè habitum dimisit. *Lucana, Genuensis, Pisana Respublica*, nullo non studio, vt Te tantum Hospitem pari exciperent apparatu, pugnârunt. *Siculi cum Neapolitani*, nè in exhibendis grato Aduenæ gratissimi Hospitij iuribus mutuò vincerentur, contenderunt; quantâ essent Tui obseruantia, per humanissimos Tibi Vice-Reges monstrârunt. *Romam*, aduenti VRBANVS VIII. Pont: Max. prolixissimam Paterno è sinu benedictionem profudit, amanter in complexum admisit, profusaque ad Aras Apostolici Senatûs Principum, pro Tuis Vitæ & Gloriæ incrementis, vota nuncupauit. Nepotes eius *Barberini*, cæteri que tot *Eminentissimi Cardinales*, multoties splendidè tractauerunt, redeuntem hospitales in ædes reduxerunt, à Te inuicem lautè tractati, officiosè reducti, conatu mutuo certârunt. INNOCENTIUS X. & antè, & post susceptos Ecclesiæ Fasces, intimis Te prosecutus fauoribus, ad prima Tua postulata, Academia Zamoscensi, promouendorum in Sacrà Theologica Facultate Doctorum Priuilegium elargitus, cætera item eius à Sanctissimis Prædecessoribus suis liberalitè concessa Authoramenta confirmauit; vtque pro Religione, Patriâ, Regibus, Ciuibus, Familiâ, hæc ageres, quæ laudabiliter egerunt Maiores Tui, & Te allocutus est, & Superos precatus. Florens semper in Lilijs suis *Gallia*, amplissimis Regijs fauoribus ornauit. Accessit Principum in eâ Heroum amor indiuiduus, & cum omnium actionum Tuarum frequens ac publica celebratio, tum propensissimi in SACRAM REGINALEM MAIESTATEM obsequij, ingens quidam ille cultus, quo, cum Te Magnificentissimæ illi, ad accersendam Thalami, ac Sceptri Regij Sociam, Serenissimam LVDOVICAM MARIAM GONZAGÆAM, amplissimorum Senatorum Legationi adiunxisses, illamque Reginam Tuam Lutetijs Parisiorum salutâsses, omnium propè Ordinum admirationem, SACRÆ verò REGINALIS MAIESTATIS, propensionem, & gratiam Tibi mancipâsti. *Æ-*qualis *Leoni Belgico* in Te exornando ornatissimo Hospite conatus, par



tus, par quibusq; Urbibus, Arcibus, Castellis, Prouincijs, Regnis contentio, omnibus votum idem, vt Te viderent, vt ornarent; à quo vicissim viderentur, ac ornarentur; nempè cui integer Virtutis & Gloriæ cultus, in debitum cessit ornamentum. Parce SPONSE ILLVSTRISSE, in hac tam locuplete dicendi materiâ, ita me parcè versari. Ignosce, non etiam illa proferre, quæ tantæ Peregrinationis studio protulisti Patriæ emolumenta: Quam à tot aditis Diuorum Aris pietatem, à tot visitatis Academijs doctrinam, à tot lustratis Rebus publicis, statuum notitiam, à tot conspectis Exercitibus, bellandi peritiâ, à tot cognitis Insignibus Viris, benè viuendi normam hausisti. Neque enim mihi, *si linguæ centum sint, omq; centum*, recensendorum eorum iusto numero, non ornandorum exquisito apparatu esset facultas; neq; in Te non magis hæc conspiciamus vniuersi, quàm ab aliquo possint referri. Quidni verò eas ipsas Regionēs frequentius visitasses? quidni Te illis sæpius Comitem adiunxisses? è quibus tanto numero, tanta Honorum commoda referbas; vbi publicis priuatisque encomijs, amor populi, spes Patriæ, totiusq; Septemtrionis Decus dicebaris; vbi Tuo Honori Reges, Senatus, Exercitus obsecundarunt; quem insuper secuti in Poloniam, tot, tantiq; illi Principum fauores, tot optatæ conuersationis studia, desideria ac vota, probatissimæq; in omnibus Virtutis, integerrimarum actionum, Heroicæ indolis, Laudatio perennis. Sed mihi Te bono Patriæ natum, iteratò ab Exteris redeuntem, omnes omnium charitates complexa Patria, amantissimis desiderijs salutat. Hem quàm tristis illa! & pullato inuoluta Syrmate, post decessum VLADISLAI Regis, quàm lachrymans mærensq; ! Vidisti eam, nec minori luctu, quàm ita miseram oportuerat salutasti. Doluisti intimè defuisse Tuam illi operam, cum primùm Tuâ egeret: non fuisse Te illis in Bellis, quibus pro vindicandâ eius oppressa libertate primò certatum. Idem ne illa doluit? minimè; quin optatissimum Reducem, integritatis suæ additum Defensorem, amantissimè suscepit. Addidisti quandoquidem vberriam ei, vel Tua illa infelicitate felicitatis materiem, quando turbatissimo illo Interregni tempore, grassantium totâ Russiâ Perduellium, coniuratos in exitium ac perniciem eius impetus, Tuo Fortunarum, Facultatūq; ditissimarum dispendio cohibuisti, ab vltiori Regni depopulatione, ab expectatâ Electionis perturbatione, à cæde & nece publicâ, Tuo isto Propugnaculo, dixerim *Poloniæ Antemurali*, prohibuisti. Quo Nomine, quàm locupletes eo ipso in Conuentu, ab Ordinibus gra-



tias laudesq; susceperis, quantum de Patriâ merueris, quam feliciter electo Serenissimo IOANNI CASIMIRO in gratiam veneris, spemque non irritam feceris, perennis in eum Dominum ac Regem Tuum officij & cultus, illi nesciant, quicunque vel inuidi detrahunt Virtuti, vel rerum expertes Veritati. Mitto hîc quâ integritate, fideliumq; obsequiorum promptitudine, Lateri tunc Regio adhæsisti. Prætereo, quam toto co Comitio dexteritatem, & indolem prætulisti. Taceo, cui Procerum Regni desiderio, ac Honori hæsisisti. Quo etiam comitatu, & officio, Coronationis Regiæ Solennijs adfuiſti; utq; ibi nihil quod Ciuem bonum commendaret, non egisti; quia hæc recenti omnium, grataque recordatione circumferuntur; non commemoro. Prodeo tecum potius in Martiam Orchestram, & ex hoc Vestali secreto in publicum Bellonæ circum, sacros Tuos Saluti Patriæ, ac perenni Famæ gressus sequor. Ingero me imaginarius licet itineris Comes illi Prælio, quod ad *Zborouum*, inuicta Potentissimi Regis dextera certauit, & usu plausuque publico, plusquam vicit. Quis ibi Tuo, si numerum spectamus frequentior, si animum, promptior fortiorq; Milite lectissimo? Quis ibi Tuis, ad aggrediendos impetendosq; Hostes conatibus animosior? Quis tuendæ Regiæ incolumitati propior? Quis reprimendo Rebellium insultui, fatigandisq; more belli Hostium phalangibus grauior? Quis in Excubijs vigilantior; in conflictu acrior? Quis in vindicando obfesso ad *Zbamz* Exercitu, hæi quam insigni Exercitu! constantior? Nimirum ibi, etsi multa fuerant, quæ Te ad hanc ita strenuam bellandi promptitudinem stimulabant; ut potè innati è Bellatrice Familia ad Ludos Martiales igniculi, Fama Maiorum, Salus & Dignitas Patriæ, Nominis futura ingens celebratio, insignisque inter Diales Fastos, meritorum in Rempublicam grauium memoria: tamèn nec minùs illud animabat, quod charissimam illam Marti Polono Animam, dixerim & Tuam, (ita eum amoris & Sanguinis nexu sociasti) Phœnicem illum sæculi ac Regni nostri, Illustrissimum HIEREMIAM KORYBVTH Ducem in Wisniowiec, vicino in Exercitu, densissima Mirmilionum nequam colluie oblitum, obfessumque videres; tantumnè verò videres? quin & doleres, aut non Te Ei, aut non Illum Tibi, tanto in Bello Socium adfuisse, quos olim Agnatus Sanguis, recens par bellandi contentio, socios habuit indiuisos. Quo Tibi reddito, salutiq; ac famæ publicæ gloriosius vindicato qui non deindè saluandæ Patriæ conatus? quæ non consilia? quæ non mutua vota? Egistis, egistis certè, quidquid



quid ibi fieri per Vos oportuerat; imò nè per Vos tantum, per Vos  
tamen maximè, ubiq; animo pares, labore infractos, fortitudine in-  
uictos, gloriâ immortales. Vellem hîc gratissimi istius ad NV-  
PTIALIA SACRA Hospitis, amplissimam fieri Panægyrim:  
sed quod tantum est dicendi flumen, quæ tanta ornandi vis, tantaq;  
copia, quæ dignâ in laudem tanto Duci còalescat? Quàm angustior  
adhæc tempore & stylo Oratio mea! quam ita omnis reliquit vigor,  
vt non tantum ornandis aliorum meritis planè desit; verumetiam  
admirandis his Tuis SACRIS, vix adsit: Si tamen absq; iniuriâ  
Tuâ, Illustrissimi istius Ducis, aliena dicam ornamenta; quæ vsq;  
adeo Tuis sociasti: vt mori ille prius potuerit, quàm Tuus non esse.  
Verumenimverò hæc mihi ampliùs cogitanti, Pacta ad *Zborouum*  
inita, à Cosacis violari, innumerabilem hostium multitudinē omni  
copiarum genere instructam, è lustris illis ac popinis Verainè atq; Scy-  
thiæ, ad arma, ad cædes, ad Ciuile latrocinium euocari, Russiam  
quâ mole patet inuadi, incendi, vastari, nullum scelus non attenta-  
ri, sparsi per Regnum passim rumores, animum obuerberant. In  
Regno porrò à vigilantissimo boni publici REG E Exercitus con-  
scribi, Nobilitas vniuersa, & intimæ Imperii vires ad Generalem ex-  
peditionem commoueri, Hosti acerbissimo, ad *Bereſteccium* oppo-  
ni videntur. Quid hîc egisti SPONSE ILLVSTRISIME?  
imò quid non egisti, quod Polono Nobili, quod Ciui Patriæ, quod  
alumno Bellonè in his eius non ludicris ludis, agendum erat? Dicam  
paucissimè, neque enim hîc verbis opus est, vbi armis tam abundè  
certatum. Mox vt eius cogendi Exercitus ad aures Tuas fama per-  
uenit, mille quingentorum Militum aciem curari, ære ac sumptu  
Tuo conscribi, atque expediri fecisti: Mox ad *Sokal* cum omnibus  
perrexisti; mox tam insignibus, ac frequentibus Copijs, communi-  
um Castrorum molem, speciem, robur auxisti. Iunxisti Te ijs,  
quibus prima aggrediendi excubantis ad *Bereſteccium* Hostis cura,  
aut Prouincia; nulli Te periculo, quo periclitantem tuereris Rem-  
publicam, submouisti: medios inter Hostium manipulos, Tuis cum  
illis Veteranis, ac Lectissimis, pugnâsti; Caput Tuum pro incolu-  
mitate Regiâ aperto discrimini toties obiecisti, Victoriæ illius tam  
insignis, multa pars extitisti. Quid autem his ad probandam Vir-  
tutem ampliùs, ad exaggerandam gloriam venustiùs, ad propaganda  
merita nobiliùs, ad promerenda præmia commodiùs fecisse potu-  
isti? quid etiâ debuisti? Properè hæc à me dicuntur, imò etiam  
multa non dicuntur; quia immorari Magnis, paruitas mea meruit:



& Tu ita promptè, atq; expeditè Magna agere didicisti; vt assequi laudando non possis. Exaggerari hæc in multis debent, de Te tantùm innui; tam lucida sunt, vt ab omnibus videri, tam illustria, vt laudari debeant: ipsa sui mentione admirantium implent animos, magnitudine excedunt. Quamobrem nec *Bialocerquensem* admiror, nec *Zwanecensem* moror ad pugnam. Spectauit Orbis, quantùm pro Republicâ in vtriusq; certaueris: nullibi non ZAMOSCIA Tecum proferens Signa ac Arma, nullibi non Auitâ Paternâq; certans Virtute, felicitate, promptitudine, gloriâ. Laudari hæc non egent, omnium laudes prætergressa, admirationem merita, digna exemplo. Dabis etiam properanti mihi, eam veniam SPONSE ILLVSTRISIME, si eò Tecum tandem veniam, quò maximè Tua Virtus properauit, vtq; iam in fastigio gloriæ memoriæq; immortalis esset, felicissimè contendit, ac effecit. Non longè mihi eius petenda argumenta, nèq; vel à prisco temporum tractu, vel ab Exterorum testimonio vindicanda. Domi sunt, in animis & oculis omnium hærent, quæ duobus his, qui se nupèr conuoluerunt annis, pro Patriâ egisti, quæ pro Libertatis illius Vindice ac Tutore, quæ contrà iuratos vtriusq; Hostes, quàm eadem strenuè, quàm commodè atq; gloriose. Parum siquidem Tibi videbatur, Lateri ac obsequio Regio constantissimè semper adhæsisse; comitemq; ac socium non Bellorum tantùm, sed periculorum etiam, damnorumq; eius extitisse. Parum odia, conuicia, minas instantis Hostis despexisse, amplissimis promissis renunciasse. Parum Religionem Sacrorum, Libertatem Patriæ, Dignitatem Regiam, Nomina Maiorum, quouis commodo, & quolibet Honore Tibi chariora demonstrasse: istorum censu omnia fortunarum dispendia, omnia pericula, Vitam & Sanguinem ipsum, ac si quid amplius istis! posthabuisse: si optio daretur, redimendæ Patriæ pretio consecrasset; parum dico fuerat; nisi id quod extrà passim vsurpabas, Domi probauisses: dum, cui tot Regnorum molimina ac moles sustinendo non fuere, ei Te Hosti opposuisses; eius consilia, & hucusque prosperas bellandi artes, Tuâ immotâ Constantiâ mouisses, confudisses. An ego Tuam istam ab inclyta Virtute laudem, prolixiùs exaggerem? atqui in eâ ad feram posteritatem cum omni elogio transmittendâ, nemo amplius non sudabit. An examinem, quæ vires, qui impetus, quæ artes, quæ pericula, quæ damna, qui artifices istorum Exercitus, pro frangendâ Tuâ infracta Fide laborârunt? at orbi & cælo palam nullis hoc in passu, vel bellorum studijs, vel pollicitationum illecebris non



bris non certatum. Quid tamen inter illa expediti terroris fulmina, quid inter hæc promissæ Dignitatis oblectamenta, Hercules ille, nam inuictus Tuus Animus SPONSE ILLVSTRISIME? an blanditijs emolliri? an minis turbari? an vicinis incendijs, damnisq; tam ingentibus moueri passus est? Absit quispiam cogitauerit. Immotus stetisti, quo fractam tot periculis, stetisse demum Rempublicam oportuerat, hoc in loco & puncto. Literis, quotquot illæ, ac quamlibet officiosæ; Literis item Tuis, perquam nobilibus, & corde in omnium inscribi dignis, respondisti. Legatos qui nihil in Te, quam priscam in Reges Domui Tuæ fidem legissent, honorificè expediti. Minas minores esse quam Tuam animi perturbationem, Dignitates, quam ambitum mererentur; declarasti. Tàm insigne facinus, tàm illustrem constantis animi virtutem, vel ab ipso Hoste probari, inq; suis optari effecisti: spem quietis & pacis, faustâ Victoriæ inchoatione, nobis omnibus restituiisti. Liceat Te nunc, quâ *Belgarum Sapiens*, MAGNUM olim AVVM Tuum decorauit, affari voce. *O nate in exemplum Virorum Principum, atq; utinam sint, qui imitentur!* O ingens Maiorum Gloria, & vel hâc etiam ipsâ maior, quas non hinc Tibi gratias, quæ non nomina mancipasti! Cedit nunc profectò Tibi, quidquid vspiam laudari potuit, in laudem: suosq; iam explicat totius memoriæ vetustas Titulos, vt Tuos impleat illo honore, quem fortissimis quibusq; debuit aut dedit, quem etiam defert ijs, qui Patriam labentem erexisse, qui lapsam extremo ab interitu præseruasse potuerunt, qui etiam seruasse. Ad eundem Magnitudinis Tuæ apparatus spectant ij, quos anno hinc præterito, ad Tua ista Mœnia conspeximus, victi iam Hostes. Vt ne etiam illius Triumphi magna quædam pars non videâre, quo prudentissimorum DVCVVM auspicijs, fortissimorum Militum laboribus ac periculis comparato, Regnum hoc frui recens potuit: siquidem Tu illos quos Hi debellarunt sædisfragos, non tantum ad Limina hæc Tua, impune grassari non permisisti; verum etiam vltice Tuorum manu profectus, vsque adeò terruisti, vt tantò citiùs illud quod meruerant, adire supplicium debuerint: quantò celerius hinc multâ sui parte cæsi attritique, euasisse potuerint: si tamen, quos tantum deinde malum inuasit, potuerint euasisse. Nemo igitur vel hîc, cum immotam Tuam Constantiam, tum Martiam istam non probauerit Fortitudinem, quam primum Serenissimus REX, deinde amplissimi Ordines, omnesque boni Ciues & Viri in Patriâ de-

E 2 prædicant:



prædicant: Exteri insuper mirantur, hostes ambiunt, Posteritas re-  
colet, memoriâ æuiternâ. Nemo itidem miretur, tantis Te Illu-  
strem Dignitatibus, beneficio insuper Regio, *Copiarum Exerci-  
tus Germanici, in Regno Poloniae* GENERALIS, Nomina &  
Insignia assumpsisse: Custodiæq; planè totius Imperij, ad *Præfe-  
ctum Camenecensem* Præfectum esse: atq; illius frangendis Bar-  
barorum insultibus, ad fines Podoliæ excitati in Rupe *Propugnacu-  
li*, Præstitum extitisse: cuius petrâ solidior Fides, & vnita huic mul-  
tiplex bellandi Virtus, tantum & passim aliàs & recens meruit, vt  
Te amplissimorum omnium Honorum, quodam maximo iurè fa-  
ciat Candidatum. Nèq; enim hic status est, vt meritorum, sic quibus  
hæc pensari debent Præmiorum Tuorum, sed princeps quidam in-  
gressus: & verè princeps, quem si tantis esse Nobilem licuit initijs,  
quantis deinde Honorum successibus insignem fieri oportebit? quos  
omnium augustissimos, prospicere, an optare Tibi frequentius de-  
beamus? Ipsemet litem soluis, cum omnes mereris. Hæ Tuæ lau-  
des SPONSE ILLVSTRISIME, hæc Elogia, hæc Nomina  
sunt. Hæc istam integram NVPTIALIVM SACRORVM spe-  
ciem exornant; vtq; concordiam omnium affectu Tibi promuntur; sic  
ampliori quadam maiestate, conspicua supereminet ab his, quæ cum  
AVGVSTISSIMA SPONSA participas ornamentis; quibus  
Te demum ornari oportuerat, nè tam eximijs abundans Honori-  
bus, solâ eorum & Vitæ Sociâ indigeres. Quodcunq; enim & quam-  
libet speciosum Magnis Nominibus bonum est; minus herclè il-  
lud est; quoadusq; in quem diffundi debeat, non habet; quoad-  
usq; eum desiderat, cui Virtutis, & Fortunæ Patriæ Successori,  
benefico hæreditatis iure concredatur; quoadusq; vnus dumta-  
xat vsu nobile, vel ineptos metuit, vel nullos sperat hæredes,  
Vtique extra id formidandum certè Illustribus Familijs discrimen,  
videntur esse illi: quoscunq; beator Hymenæus, cum ad sua Fœ-  
derum Maritalium vocauerit instituta: tùm eâ simul optatissimæ  
Posteritatis, ac Proles spe confirmavit, vt nequeant esse in agendis  
quibusq; maximis pro Ecclesiâ ac Republica non perennes, quos  
perennitas quædam certa manet, nullis vnquam vel temporum  
interstitijs, vel rerum ambagibus, in numerosâ sobole desitura. Ijs  
Te hodie salutamus auspicijs, atq; his Tibi votis, Urbem hanc &  
Domum Nostri Herois introëunti acclamamus, quàm ordine gratu-  
lationis remoti, tam desideriorum candore primi Academici Zamo-  
scenses, SPONSA ILLVSTRISIMA. Illi nimirum, quibus  
cùm ad



cū ad omnes Benefactorum successus, prima semper gratulandi officia fuere, tū ad hos fortunatissimi Vestri Hymenæi apparatus, tam prompta, tamq; deuota sunt; vt appellari aliàs quàm SACRA, non possint, quæ toto animo, desiderio, affectu, Honoribus Vestris consecramus. Etenim quod vnicum ad exaggerandā ZAMOSCIÆ amplitudinis dignitatem, maximè pertinebat; quodq; solum optandum nobis supererat vniuersis, vt exoptata toties PATRONO CONIUNX, nobis PATRONA, ad illam Eius participationem Honorum, nostrorumq; hanc comprobationem Laborum tantocius obueniret; id cum in Te Vnā vtrumq; habeamus, iurè nobis abundantius gaudemus, Tibi gratulamur; & cū sæpè postea vsurpabimus, tū ad NVPTIALIA hæc primū SACRA, libentissimè acclamamus: diuinitus Te nobis PATRONAM obtigisse, diuinitus SPONSAM PATRONO. Hæc est quandoquidem Tua ab augusto illo deriuata Sanguine ingenuitas: quod quibusq; Maximis GALLIARVM Familijs Cognata, ita ZAMOSCIAM ILLVSTRISSIMI SPONSI Tui, Principibus omnibus in Regno Poloniæ coniunctam Prosapijs, ornaturam Te promittas Domum inclytam; vt nihil exhinc Ei ad exaggerandam immensæ magnitudinis speciem deesse valeat, posteaquàm Patrijs honoribus tam insigniter illustrem, hic insuper TECVM ab Extero Solo nitor accessit. Ac quemadmodum probatissima Bello & Pace amplissimorum Tuorum MAIORVM gesta, Christianissimum illum Orbem, magnā semper admiratione tenuerunt, famā illustrarunt, nuncq; etiam indefessis pro Ecclesiā ac Republicā Illustrissimi PARENTIS laboribus, sustinent ac illustrent; ita non ingenti quodam sinè auspicio, in hanc deniq; meritisimam Domum commigrarunt; vt Maxima nimirum vnita Maximis, tantò firmitus, ac exactius, in auspex illud stabilimentum coalescant, quassatæ tot procellis Ecclesiæ Catholicæ, distractæ tot ab hostibus Patriæ nostræ, & florentissimæ vtriusq; Familiæ, augendis Ecclesiæ Patriæq; ornamentis genitæ, ac in æuum victuræ. Hæc omninò spe, atq; etiam expectatione iubent nos esse, præter augustissimæ Domus ornamenta, Maiorumq; tanta decora! & agnati Sanguinis toto Orbe peruagata Insignia; Tuæ insuper ingentes illæ Dotes, quas singulari quadam cœlorum prærogatiuā, tam amplas, tamq; liberales possidisti; vt omnem propè Illustrium Heroinarum mundum, occupasse videāre; illum inquam comptissimæ Virtutis ac Formæ, quo nihil magis comptum, & mundum. Atq; cum summa in Te DEVS  
F gloriosus




gloriosus congeſſerit, & Naturæ Bona, & ornamenta Fortunæ;  
tum nihil præclariùs, nihilquæ dignius, quàm quod illam in Ani-  
mo Tuo radicauerit Pietatem, quâ demùm eſſe oportuerat exorna-  
turam eos SPONSAM Thalamos, in quibus ſola Pietas radices  
egit, quos ipſa ornauit, ac fouit, omnium fanè Virtutum Mater.  
Illam Pietatem, cuius feruore, uſq; adeò Te Diuino cultui deuoti-  
ſti, uſq; adeò Virginis DEI MATRIS, mortalium Aduocatæ,  
Sanctorumq; afflicti Orbis ac Regni Tutelarium; vt nihil frequenti-  
ùs in Te quiſquam videat, ac perennes quaſdam, continuasq; illo-  
rum Honoris curas, ac ſolicita ornandorum, augendorumque Sa-  
crorum ſtudia & vota, ac profuſiſſimas ad Altaria Diuùm preces:  
tantâq; inter Rem Diuinam, tantâ inter prolixa Sacrorum Sole-  
mnia, tantâ inter Horariarum Concionum moras patientiâ! pro-  
pè indefeſſas. Illam Pietatem, cui nec tranquilla noctium, nec la-  
borioſa dierum otia, uſquàm eſſe concedunt otioſæ, quam diu-  
rnis nocturniſque ad venerationem Superùm excubijs excitas ac au-  
ges; ſic otari ſolita vt ſemper agas aliquid; ſic agere, vt tum de-  
mùm ſuauiſſimè Tibi otari videâre, quando negotioſum otium  
conſecras Aris ornandis. Illam adextremum Pietatem, quam in  
Te demùm maximam videri facultas eſt: Cuius Infantis Cunas im-  
menſa illa Gentilitia in Deum Diuoſque Religio, tot Templis,  
Aris, Altaribus, Xenodochijs, ubiq; per ampliſſimum Galliarum  
Regnum, erectis, dotatis, ornatis, extructis conſpicua, tenuit, ac  
fouit; & cuius reliquam ſuccreſcentis felicitatem ætatis REGIA  
illa habuit, non minùs Catholicæ Religionis, quàm Polonicæ Ma-  
ieſtatis Suprema Domus: imò ipſa Sereniſſima LVDOVICA  
MARIA Poloniæ ac Sueciæ REGINA educauit: Cuius quantò  
maiora ſunt in Eccleſiam, atque hanc noſtram Rempublicam pro-  
merita, tantò Tua videntur gratiora omnibus Elogia, tantò ampli-  
ùs ab his, conſtantiſſimæ teſtimonium Pietatis, maiorq; laus emi-  
nentiſſimarum Virtutum. Enimuerò cum SERENISSIMÆ  
eius memini: non eſt quod in explicandis ſexcentis alijs Animi Tui  
dotibus prolixiùs adlaborem. Ipſa eius mentio omni honore di-  
gna, Dignitates Tuas explicat vniuerſas, quas tantò certiùs & fre-  
quentiſſimo numero, & venuſtiſſimo quodam apparatu poſſediſti;  
quantò nobiliùs verſata es in illo virtutum Auguſtali, in Oculis ac  
Delicijs eius REGINÆ, cuius excellentium virtutum ſplendor, to-  
tius non tantum Regni, ſed etiam Orbis oculos, in admirationem  
ſui conuertit. O Te Nobilem illâ Palæſtrâ! at nec minùs illam Te  
Alumnâ



Alumnâ fortunatam; à quâ nihil quidem pro institutâ hac Indole  
 gratitudinis non expectet; posteaquàm in illam migrasti DOMVM,  
 quæ nedùm tantis obstricta beneficijs? gratissima semper extitit illi  
 REGIÆ, cuius Honorem Vitâ & Sanguine sibi chariorem, toties te-  
 stata est, & recens monstrauit. Ingressa es videlicet, & auspicatò  
 quidem vt optauimus, ingressa illam DOMVM, SPONSA ILLV-  
 STRISSIMA, quam olim tot Principes Matronæ, tot Diuæ Fœ-  
 minæ Connubijs suis ornârunt: quam insignes felicissima Prole  
 HERBVRTEÆ fæcundârunt, celebres toto Orbe Affinitatis  
 imaginibus OSSOLINIÆ auxerunt, insignes Ducali Purpurâ RA-  
 DIVILIÆ decorârunt, affines Regalibus Sceptris, BATHOREÆ  
 firmârunt, Lucidæ, quâ Gentilitijs Syderibus, quâ splendissimis  
 Virtutum ornamentis TARNOVIÆ illustrârunt; quam adextre-  
 mùm, (compendium vt loquar) Compendium ac Collegium illud  
 Insignium per totam Poloniam Familiarum, Illustrissima CATHA-  
 RINA DVCISSA in OSTROG, tantùm stabiliiuit, quantum po-  
 tuit ac debuit illa, quæ ad ædificandam Mariti Sui THOMÆ CAN-  
 CELLARII Domum, ex illa Ducali, tot Honoribus amplâ, meritis  
 augustâ, nominibus illustri Domo assumpta, omni quidem hûc co-  
 natu incubuit, vt quàm felicissimè stabiliret, nobilitate Exornatri-  
 cis Regnorum Proles, maturitate firmatricis Familiarum Pietatis,  
 altricis Prudentiæ, & in summâ, omnium specie Virtutum. Quid  
 enim est Illustrissimæ huic DOMVI tam illustre, cuius in maxi-  
 mum, non Consortium tantùm, sed opus etiam, necdùm in for-  
 tem, verùm in Constitutionem quóque, istius HEROINARVM  
 PRINCIPIS, non accesserit Mens, Manus, Sumptus, Labor, Co-  
 natus? Intuemur istam BASILICÆ COLLEGIATÆ speci-  
 em? hæc eam numerosis Presbyterorum ordinibus auxit; hæc venu-  
 stissimâ Altarium supellectili decorauit; hæc fundato Cleri Semina-  
 rio ampliavit, hæc auro argentoq; exornandis Aris liberaliter pro-  
 fuso locupletauit, hæc ( nè tantum opes, & non opus etiam Supe-  
 ris deuoueret) gracilibus illis Manibus textas, paratasque, quibus Sa-  
 cris litatur preciosissimas vestes, curauit, donauit. Conspicimus  
 istam ACADEMIÆ molem? hæc eadem, iungens conatus  
 suos extremis IOANNIS & THOMÆ ZAMOSCIORVM  
 Tabulis, à Fundamentis illam excitauit, erexit: Eadem Professores  
 censu, Vniuersitatem numero Professorum auxit, Literis Patroci-  
 nio incrementum, Literatis honore solatium, ac promptissimos ad  
 omnem in Academicâ statione sedulitatem & fidem animos adiecit.



Videmus adextremum hunc VRBIS decorem? Illa ipsa Ciues ciuiler habuit, neminem Incolarum ad se accessisse passa, cui non singulare aliquod benignitatis munus exhibuisset; omnes beneficijs fuit, gratijs firmavit. Quidni porro Eam vniuersorum desiderijs Tu restituas, quam ita iam moribus reddis? Quidni successione exprimas; quam animo sic impressisti, vt viua quædam eius Tecum circumferas insignia Virtutum, Orbiq; repræsentantes in hoc sereno Vultu, grauitatis, in his Oculis lenitatis, in rubore verecundiæ, in sermone prudentiæ illius exempla. Id profectò sperare nos iubet Tua ista amplissimarum Virtutum testis modestia, iunctaq; ei cum maxima probitate, summa mansuetudo, & in omnibus excellens quædam Animi moderatio ac constantia. Id etiam spondent & promittunt, fortunata hæc nobilissimi auspicia Hymenæi, tot honorum Ciuium desiderijs, tot suspirijs subditorum, plena ac ampla. Cui cum nos quoque NVMINI, non vilo nostro censu aut cultu, sed Maximis MAIORVM Vestrorum Insignibus, Nobilissimis FAMILIARVM ornamentis, venustissimis VIRTVTVM imaginibus, decora SACRA instaurauimus: Vota insuper hæc nostra adiungimus: optamusq; (ac puro quidem isto corde,) vt semper florentes, semperq; incolumes, non inchoetis tantum, sed etiam continuētis hanc Lætitiā. Tu Optime Maxime rerumq; omnium, istiusq; Hymenæi Conditor & Auctor DEVS: Tūq; Diuinissimarum Diuinissima, Casta inter Virgines MATER, fecunda inter Matres VIRGO: humanarum mentium Dominatrix. Et Vos Indigenæ Cælorum DIVI, supplicibus his nostrum desiderijs prospicite, annuite. Facite hoc suauissimis SPONSIS prosperum Coniugium: Facite bonā ac pulchrā Prole fortunatum: idq; primum tribuite, quod à Vobis plurimum postulamus; vt inclytum hoc Par, quod concors iunxit amicitia, sospes & incolume, plenos Honoribus annos, plenas solatijs ætates viuat, **VIVA T.**




---

ZAMOSC I, In Officinā Typographicā Acad: Zamosceñ:  
Imprimebat ANDREAS IASTRZEMSKI.



